

豫

章

叢

書

第八冊

重刻張來儀靜居集卷三

潯陽 張羽 來儀 著

高安 陳邦瞻 德遠 校

新都 汪汝淳 孟樸 全校

七言古體

米元暉雲圖

前代幾人畫山水逸品只數南宮米海嶽樓前北固
山頂刻雲烟生滿紙古云丘壑起心胷恍惚似與神
靈通素壁高懸臥清晝耳邊恍若聞松風怪底青山
起毫末森沈綠樹臨溪活仙人道士疑可招芝草琅

牙俯堪撥千里能移方寸間天機揮洒過荆關如今
畫史空無數對此高踪詎敢攀

高彥敬雲山圖

房山尙書師小米畫得雲山稱獨步筆精墨妙心更
苦世間畫史空無數羨君平生愛奇古興來寫此滄
洲趣須臾丘壑吐心曾高閣連江動烟霧峭壁喬松
靜杳冥森然似與神靈遇咫尺圖中萬里景慘淡悲
風起毫素高堂坐對心神融我欲誅茅向何處

送周以道入大學

吳興才子生白晳弟子員中名第一窮經解說毛公

詩摘文早夢江淹筆入學六年今入六部書妙選赴
神京廣文惜別將詩送造士聞來罷講迎杏花壇前
拜師傅芹藻池邊試章句橋門學者如堵牆看君落
筆揮三賦從此飛騰異眾人豈對囊螢長苦辛聖朝
用才不論次年少逢時當致身離城祖帳紛成列絲
柳絲絲正堪折毗陵道上逢梅雨丹陽城裏經蒲節
臨期與子一躊躇莫忘草澤共閑居古來貧交不可
棄行到金陵好寄書

梁節婦

赤城曉擁青絲騎玉鏡愁鸞落紅淚冰魂偷逐水仙

歸綺樓一夜靈犀碎六曲闌空不礙春羅帶盤風輕
颺塵池波不動夜光碧青天影落桃花雲相思月照
樓前水離離芳樹流紅子無情桃李亂中開不學芙
蓉抱霜死

送人之官河南

羨君罷秩好遊豫舊遊不憶洛京路鴈飛不到吳天
遙千里中原君獨去別離最惡莫秋時縱使事歡情
亦悲西風吹寒射馬耳處處蟲鳴桑葉飛行李匆匆
涉長道風波險阻難自保月昏山店起宜遲古道人
稀歇常早單車御風周晉間山川奇勝恣追攀千金

厚利亦何有世間萬事如等閑
愧我浮沈局間井遙望嵩山一
何永別來莫遣寄書稀爲看南
來鴻鴈影

奉贈李仲賓侍郎

太白醉吟詩百篇龍眠能畫兼
能禪二老清風今儼然息齋家
法得正傳胷中造化妙幹旋眼
高四海空雲烟若非天上人定
是地上仙數莖白髮籠烏紗學
佛未肯披袈裟長槍大劍不
留意脊梁鐵豎雙結跏蒲團漏
泄真消息毛錐迸出優曇花有
時或賦詩風號雨鳴神鬼悲麗
如天孫織成雲錦衣奇似波神
捧出珊瑚枝有時或寫竹密密
疎疎翠新沃三竿兩竿

風外斜千葉萬葉烟中綠清處夷齊心透水瘦時郊
島肩削玉不然翰墨淋漓洒黑雨紙上龍蛇欲飛舞
法度忽似于祿帖規模又入蘭亭序或說有或談空
龐老維摩立下風龜毛排掃乾滄海水兔角杖擊碎
須彌峰君之三昧何從得太白龍眠疑未識我來叩
君君不言一笑相看遠山碧

賦山中樂送友還山

山中自得山中趣卜居近山向山住采山買斧暫離
山憶着青山還復去陰陰夏木綠成帷百尺垂蘿可
製衣清歌自有流鶯囀妙舞時看戲鳥飛結友漁樵

與麋鹿豐草長林自相逐穿雲摘果常滿筐入澗採
芝易盈掬朝卽對山飲暮卽對山吟山古如我貌山
清如我心以此只知山中樂不願市朝與城郭我愛
青山亦不薄送君聊賦還山作願輸十萬買鄰錢相
逐幼輿住巖壑

贈四明袁生廷玉

儒而善相

和氏善相玉楚人乃失之後王不深諒空沈沙與泥
方歎善相馬秦穆猶見疑向無孫陽識終與駕駘齊
人生窮達在用舍呂公許負將何爲君不見淮陰餓
隸封侯面沛公不遇仍貧賤又不見新豐孤客人莫

顧可憐未入常何薦英雄不用則爲鼠燕頤虎頭何
足羨袁生炯炯雙瞳方走馬能識人中王如何不帶
食肉相一生奔走鬚眉蒼由來目睫不自見何不借
取青銅光生云富貴不足取我欲玩世聊徜徉昔年
夏統在京洛不說姓名惟賣藥眼中不見賈侍中小
海歌闌風雨作生乎生乎如其人飄然東歸東海濱
倘過鑑湖逢賀監爲報山人行乞身

題赤城霞圖送友歸台

結髮好名山遨遊遍吳楚東遊不到天台路長憶興
公賦中語赤城煥高霞翩然空中舉靈溪碧草春淒

溼瀑水和風響秋雨我欲振金策飄飄凌九垓遊神
不死庭迴光眺瓊臺手招丹丘人共臥石上苔紅顏
去人不復返老大求仙嗟已晚生今一去愁人心
生赤城圖聽我赤城吟勞勞亭下一杯酒離愁萬里
生秋陰客車明日當早發雲飄孤飛度東越國清寺
前千尺松巖晚應歸望山雪道逢寒山子爲寄相思
情未絕山人若欲知我心五界峰頭看明月

天目山房

昔臥香爐頂汎觀山海圖東遊擬拂華蓋雲下瞰弱
水窺蓬壺天公有目何不在天世傳寄在茲山巔兩

泓碧水涵霜鏡炯如雙瞳落天邊天高聽卑視亦宜
然云有十二清虛之洞府珠宮貝闕不可睹靈風颯
颯卷飛雨危石深林人上苦盤渦轉轂若雪山青天
隆隆響天鼓龍藏其中是耶非但見人魚作人舞慎
勿戲之逢彼怒頃刻滂沱淚下土前年南昌仙邀我
望山雪神官玉女待我來欲往從之路超越若人有
仙骨居與洞府隣雙童耕雲種瑤草石田自熟無冬
春臥處烟霞飛枕席醉裏山花落酒巾松風蘿月朝
復暮坐見麻姑白髮新我欲駕白鹿共子攀雲岑請
天開天日照我一片冰雪之清心但恐此目不可視

如星有箕斗不可斂與斟且復臨流漱金碧聽我長
歌金石音不然倒却池中水釀作百斛之春酒共君
酣醉臥雲林洪崖舉手或相接更結丹梯千萬尋

遊鄒縣嶧山

嶧山山高數百尋山下咫尺仙凡分紅白花開淺深
樹高低石架玲瓏雲祖龍虎視啖六國臣斯篆文頌
功德倭詞詔語勒諸石野火一焚已無跡亞聖碑紀
王祠呵衛煩靈祇騶衍宅韋賢墓榛莽知何處紫烟
翠霧鎖空濛恍疑誤入桃源路洞口仙翁坐芝石雙
臉凝丹髮垂素見人長揖無一語松間指看三珠樹

左金童右玉女捧螺杯擘麟脯霓裳曲奏胎禽舞玻
瓈盤瀉薔薇露笑遊乘興不知醉一覺黃梁天地外
啼鳥數聲幽夢醒業風吹入紅塵境生來結得山緣
熟每見好山如骨肉看山看水二十年神仙窟叢今
拭目不須更走匡廬間老死嶧山心亦足何時五花
峰頂突結小茆茨白鴈白雲種黃獨

或云題首
有一夢字

望太湖

登高丘望遠澤蓬萊三山不可測何如具區億萬頃
洞庭連娟向空碧東風吹盡吳天雲玉盤雙螺翠堪
摘我昔東遊鳳凰臺嵯峨巨觚如山來白波不動鏡

光曉雲颿千幅爭先開中流縮首心茫然恍如乘雲
行九天驚濤忽逐迴風旋砰雷轉轂奔雪山龍伯鬼
國見眼前失勢一落鱗蛟涎舟師拍浪咒浪婆我亦
再拜不敢言平時之險且如此何況震蕩洪荒先帝
堯咨嗟逾九年黃能無勲幽羽淵有子大聖與天通
一朝出我羣魚中試觀此湖險始知四載功長養草
木華無心謝春風吳越之事良可鄙虎戰龍爭方未
已水犀百萬今安在惟見夫椒白雲裏鴟夷身退帶
蛾眉不直滄波一杯水我欲臨流叫神禹湘靈鼓瑟
馮夷舞盡挽湖波釀作葡萄春飲醉扁舟臥烟雨

沈氏宜春堂屏徐給事賁所畫春雲疊嶂

休文堂前花滿枝風物四時春更宜前年三月宴客
時坐上才傑皆能詩衆中獨許姑蘇客千里江山貯
胃臆醉來意氣爲傾倒寫出層層好山色素屏十尺
粉堊鮮千巖萬嶂含春烟客子疑行灞橋路人家似
住武陵源山僧投寺亂松裏山下鳥啼人未起柴扉
日出扁蓀蘿漁網波生撒江水楚水湘雲互蔽虧渚
宮隔岸遙霏微東崦晴嵐西崦雨何處長歌樵子歸
亭下流泉春浩浩上有居人往來道相過總是看山
來衣冠雖別情皆好主人愛翫不下堂清晨掃地坐

焚香晴看似見孤雲起暮對疑聞細草芳夫君平生
於我厚記君新吟常在口長干一去無尺書謾對此
圖嗟妙手一從作吏此事廢從前畫癖今除否遙知
紫陌紅塵下每爲雲山一回首人生適意在杯酒萬
事浮雲亦何有君乎何日歸去來畫裏青山待君久
此與後三首因題畫而歷敘

倪元鎮畫竹沈御史所藏

雲林之子有仙骨平生好潔如好色紛紛濁士等蟲
沙嗚呼瓚也何由得憶昔常登清閼堂鵲尾爐蒸龍
涎香紹京妙墨僧繇畫示我不啻千明璫人間萬事

如飛電洗玉池空人不見季子城東土一坏何人爲
著黔婁傳繡衣使者騎青驄曾聽竹枝湘水東歸來
見此若夢寐巴陵洞庭生眼中江湖豪翰今零落君
得此圖良勿薄愧我題詩憶故人黃鶴何年下寥廓

王元章墨梅

王郎志奇貌亦奇與世落落噤莫施一朝騎牛入都
市關吏不識誰何之歸來老作會稽客干戈歟起西
南陸青袍白馬風塵裏越州城邊戰不已雄襟自許
魯仲連一箭無成身已死世上空餘寫墨花只將名
姓花光比於乎人生有才不盡用古來埋沒皆如此